

FAKTOR-FAKTOR PENYUMBANG KADAR KELAHIRAN ANAK TAK SAH TARAF DI MALAYSIA: TINJAUAN SARANAN DARI AL-QURAN DAN AL-SUNNAH

Ahmad Syukran Baharuddin (Corresponding author)

Fakulti Syariah dan Undang-Undang,
Centre of Research for Fiqh Forensics and Judiciary,
Institut Sains Islam, Universiti Sains Islam Malaysia, 71800 Nilai, Negeri Sembilan, Malaysia
E-Mail: ahmadsyukran@usim.edu.my

Wan Abdul Fattah Wan Ismail

Fakulti Syariah dan Undang-Undang,
Centre of Research for Fiqh Forensics and Judiciary, Institut Sains Islam, Universiti Sains Islam
Malaysia, 71800 Nilai, Negeri Sembilan, Malaysia.
E-Mail: wanfattah@usim.edu.my

Lukman Abdul Mutalib

Fakulti Syariah dan Undang-Undang,
Centre of Research for Fiqh Forensics and Judiciary, Institut Sains Islam, Universiti Sains Islam
Malaysia, 71800 Nilai, Negeri Sembilan, Malaysia.
E-Mail: lukman@usim.edu.my

Syahirah Abdul Shukor

Fakulti Syariah dan Undang-Undang, Universiti Sains Islam Malaysia,
71800 Nilai, Negeri Sembilan, Malaysia.
E-Mail: syahirah@usim.edu.my

Nik Salida Suhaila Nik Saleh

Fakulti Syariah dan Undang-Undang, Universiti Sains Islam Malaysia,
71800 Nilai, Negeri Sembilan, Malaysia.
E-Mail: salida@usim.edu.my

Zulfaqar Mamat

Fakulti Syariah dan Undang-Undang, Universiti Sains Islam Malaysia,
71800 Nilai, Negeri Sembilan, Malaysia.
E-Mail: zulfaqar@usim.edu.my

ABSTRAK

Isu kelahiran anak tidak sah taraf masih belum selesai. Penyelesaian seharusnya dilihat dari akar umbi selaras dengan pendekatan yang diterapkan oleh al-quran dan al-hadith. Artikel ini menganalisis faktor penyumbang kepada kadar kelahiran anak tak sah taraf dalam kalangan masyarakat Islam di Malaysia. Kajian telah ini menganalisis faktor-faktor penyumbang kepada kelahiran anak tak sah taraf

menggunakan metodologi temu bual dan analisis dokumen. Secara keseluruhannya, terdapat tujuh tema utama faktor-faktor yang mempengaruhi bilangan kelahiran anak tak sah taraf antaranya ialah, faktor keluarga, agama, pendidikan, rakan sebaya, teknologi, perasaan semula jadi, dan pergaulan bebas. Dapatan kajian ini memperincikan sub-faktor bagi faktor-faktor utama yang seharusnya ditekankan dalam menangani permasalahan ini. Makalah ini kemudiannya mengutarakan solusi bagi faktor-faktor tersebut melalui al-quran dan al-sunnah. Kajian lanjutan perlu dilakukan menerusi pelbagai medium dan metodologi bagi mengisi beberapa kelompangan yang telah dijumpai semasa kajian ini dilakukan.

Kata Kunci: Anak tak sah taraf, Nasab, Faktor, Kelahiran, Keluarga, Islam

PENDAHULUAN

Isu kelahiran anak tidak sah taraf masih belum selesai. Penyelesaian seharusnya dilihat dari akar umbi selaras dengan pendekatan yang diterapkan oleh al-quran dan al-hadith. Artikel ini menganalisis faktor penyumbang kepada kadar kelahiran anak tak sah taraf dalam kalangan masyarakat Islam di Malaysia. Kajian telah ini menganalisis faktor-faktor penyumbang kepada kelahiran anak tak sah taraf menggunakan metodologi temu bual dan analisis dokumen. Secara keseluruhannya, terdapat tujuh tema utama faktor-faktor yang mempengaruhi bilangan kelahiran anak tak sah taraf antaranya ialah, faktor keluarga, agama, pendidikan, rakan sebaya, teknologi, perasaan semula jadi, dan pergaulan bebas. Fenomena terbesar mendorong kepada kelahiran anak tak sah taraf adalah seks bebas dan rogol. Data yang diperolehi hasil daripada lawatan dan temu bual ke pusat-pusat perlindungan wanita yang terpilih seluruh Malaysia telah ditranskripsikan dan dianalisis dengan teliti dan agar dapatan yang diperolehi dapat menjawab persoalan-persoalan bagi permasalahan ini. Hasil dapatan temu bual dan proses pengkodan bagi data-data yang dikumpulkan menunjukkan terdapat beberapa tema yang utama berkaitan dengan gejala kelahiran anak tak sah taraf. Ia seterusnya dipadankan dengan saranan-saranan yang telah dinyatakan berdasarkan al-quran dan al-sunnah.

FAKTOR KELUARGA

Keluarga memainkan peranan penting dalam pembinaan insan. Ibu bapa adalah pencorak kehidupan anak-anak dan keluarga. Peranan ibu bapa dalam pembentukan peribadi insan tidak dapat dinafikan.


كُلُّ مَوْلُودٍ يُوَلَّدُ عَلَى الْفِطْرَةِ، فَأَبَوَاهُ يُهَوِّدَانِهِ أَوْ يُنَصِّرَانِهِ أَوْ يمجِّسَانِهِ

Maksudnya: Setiap anak yang dilahirkan itu dalam keadaan fitrah (suci bersih), kedua ibubapanyalah yang mencorakkannya menjadi yahudi atau nasrani atau majusi.

(Hadis Riwayat al-Bukhari 1296)

Dapatan kajian menunjukkan bahawa punca berlakunya masalah seks bebas dan kehamilan luar nikah adalah terkait dengan kegagalan suatu institusi kekeluargaan. Hal ini ditambah dengan faktor ibu bapa bercerai dan sering bertengkar yang membawa kepada kurang komunikasi antara ibu bapa dan anak-anak, kurang pemantauan yang lebih kerap terhadap anak-anak sehingga anak merasa kurang disayangi oleh ibu bapa mereka. Ibu bapa yang kurang mengamalkan agama pula tidak prihatin dengan siapa anak mereka berkawan dan memberi kebebasan seratus peratus kepada anak-anak mereka. Selain itu, didapati bahawa masalah ekonomi keluarga juga turut menyumbang kepada gejala ini di mana rata-rata mereka yang terlibat adalah daripada kalangan mereka yang miskin, tinggal di rumah yang kecil dan tidak selesa di samping adik-beradik mereka yang ramai.

Hal ini menyebabkan ibubapa terpaksa mengerah keringat bekerja lebih masa untuk menyara keluarga dan menyebabkan pengabaian anak-anak di rumah tanpa pemantauan yang baik. Akhir sekali, terdapat juga faktor luaran seperti perkahwinan campur serta pengamalan adat-adat tertentu yang diamalkan oleh keluarga terutamanya oleh etnik di Sabah dan Sarawak yang menyebabkan lahirnya anak yang mempunyai masalah pendaftaran disebabkan oleh kekurangan dokumentasi dan sebagainya. Rajah 1 merupakan taburan data berdasarkan peratus temu bual yang dilakukan terhadap responden:



Rajah 1: Taburan Kod-Kod Hasil dari Temu bual terhadap Responden bagi Faktor Keluarga

Terdapat 10 pecahan yang dapat dikod di dalam tema Keluarga. 26% responden menyebutkan bahawa ibu bapa yang tidak memantau anak, 13% pula keadaan ibu bapa bercerai dan sering bertengkar dan tidak mengamalkan agama. Masing-masing 9% berkaitan ekonomi keluarga yang rendah, kurang kasih sayang, kurang komunikasi, dan tempat tinggal kecil dan tidak selesa. Manakala 4% pula selainnya iaitu terlalu memberi kebebasan dan kegagalan institusi kekeluargaan.

Peranan institusi kekeluargaan haruslah dijaga dengan baik. Setiap pihak perlu mengetahui tanggungjawab masing-masing dalam menerapkan didikan kepada anak-anak. Tanggungjawab-tanggungjawab ini termasuklah kepada penyediaan material/ekonomi dan juga sokongan kekeluargaan. Sokongan kekeluargaan yang dimaksudkan adalah termasuklah menjaga batasan pergaulan, memberi sokongan moral, motivasi dan komunikasi. Sebagai contoh dalam batasan pergaulan dengan orang asing, selain keluarga, ahli keluarga hendaklah menjaga batasan tertentu:

لَا يَحِلُّ لِمَرْأَةٍ أَنْ تَصُومَ وَرَوْجُهَا شَاهِدٌ إِلَّا بِإِذْنِهِ، وَلَا تَأْذَنُ فِي بَيْتِهِ إِلَّا بِإِذْنِهِ...

Maksudnya: Tidak halal bagi seorang wanita untuk berpuasa sementara suaminya ada di rumah, kecuali dengan izinnya. Dan tidak boleh mengizinkan seseorang masuk ke dalam rumahnya kecuali dengan izinnya...

(Hadis Riwayat al-Bukhari 4796, *Kitab al-Nikah, Bab La Ta'dhan al-Mar'ah fi Bayt Zawjiha li Ahad 'Illa bi Izniha*)

Hadis ini menitikberatkan perbatasan pergaulan dalam keluarga agar semua pihak berasa selesa seterusnya berasa tidak kekok untuk terus hidup dan mendapat sokongan ahli keluarga yang lain.

Komunikasi berkesan adalah kunci untuk menjadikan sebuah institusi kekeluargaan penuh dengan kasih dan sayang. Pelbagai hadis dan ayat al-quran telah pun menjelaskan perihal perkara ini. Nabi s.a.w. menegaskan dalam sebuah kenyataan hadith yang diriwayatkan oleh Abdullah ibn Mas'ud:

لَيْسَ الْمُؤْمِنُ بِالطَّعَّانِ وَلَا اللَّعَّانِ وَلَا الْفَاحِشِ وَلَا الْبَدِيءِ

Maksudnya: Seseorang mukmin itu bukanlah seorang pemaki hamun, mengutuk, berkata keji dan mempunyai lidah yang kotor.

(Sunan al-Tirmidhi, *Kitab al-Birr wa al-Silah, Bab ma ja' fi al-La'nah*. No. hadith 1977)

Komunikasi keluarga yang sering didasari dengan kata-kata kesat dan tidak sopan cenderung untuk memberi kesan tidak selesa dan kebosanan terhadap remaja. Konotasi negatif yang sentiasa dipamerkan dalam pertuturan seharian menyebabkan ianya menjangkiti akhlak dan tindakan seseorang individu. Ditambah pula dengan faktor rakan sebaya yang mempunyai latar belakang keluarga yang seakan sama

menambah buruk situasi tersebut. Hadith tersebut menjelaskan bagaimana tutur kata yang baik dan sopan dapat membantu memberikan keharmonian dalam sesebuah keluarga.

Komunikasi dalam keluarga juga perlu dilihat dari kebiasaan dan norma kehidupan manusia. Manusia akan memandang orang yang berkata-kata sebagai wajar bertindak terlebih dahulu sebelum menyuruh orang lain melakukannya. Bertepatan dengan hal tersebut, firman Allah s.w.t. di dalam al-Quran:

يَا أَيُّهَا الَّذِينَ آمَنُوا لِمَ تَقُولُونَ مَا لَا تَفْعَلُونَ - كَبُرَ مَقْتًا عِنْدَ اللَّهِ أَنْ تَقُولُوا مَا لَا تَفْعَلُونَ


Maksudnya: Wahai orang-orang yang beriman! Mengapa kamu memperkatakan apa yang kamu tidak melakukannya!. Amat besar kebenciannya di sisi Allah - kamu memperkatakan sesuatu yang kamu tidak melakukannya.

(Surah Al-Saff: 2-3)

Maka, dapat dilihat bahawa Islam sangat memberi penekanan terhadap isu kekeluargaan sebagai suatu amanah yang perlu dipikul oleh semua pihak. Setiap ahli dalam keluarga mempunyai peranan masing-masing dalam memastikan keluarga dapat mempraktikkan ajaran-ajaran yang dianjurkan oleh al-quran dan al-sunnah.

FAKTOR AGAMA

Agama adalah tunjang dalam kehidupan. Nilai agama memandu manusia ke jalan yang benar dan menghalang manusia dari jatuh ke lembah kebinasaan. Tanpa agama, manusia akan terpesong dan akan menatijahkan situasi sosial yang amat parah. Menurut kajian yang dilakukan oleh Zulkifly (2006), masalah sebegini adalah disebabkan kurangnya kesedaran dalam kepentingan agama sama ada dalam kalangan ibu bapa atau masyarakat umum. Dalam Rajah 2, hasil temu bual mendapati 62% responden memberikan maklum balas berkaitan faktor kurang pengamalan agama sebagai salah satu punca permasalahan. 38% responden pula menyatakan antara faktor lain adalah tidak mempunyai asas agama yang kuat.



Rajah 2: Taburan Kod-Kod Hasil dari Temubual terhadap Responden bagi Faktor Agama

Dalam Rajah 2, hasil temu bual mendapati 62% responden memberikan maklum balas berkaitan faktor kurang pengamalan agama sebagai salah satu punca permasalahan. 38% responden pula menyatakan antara faktor lain adalah tidak mempunyai asas agama yang kuat.

Firman Allah s.w.t.:


يَا أَيُّهَا الَّذِينَ آمَنُوا اسْتَجِيبُوا لِلَّهِ وَلِلرَّسُولِ إِذَا دَعَاكُمْ لِمَا يُحْيِيكُمْ ۚ وَاعْلَمُوا أَنَّ اللَّهَ يَحُولُ بَيْنَ الْمَرْءِ وَقَلْبِهِ وَأَنَّهُ إِلَيْهِ تُحْشَرُونَ - 8:24

Maksudnya: Wahai orang-orang yang beriman, sahut dan sambutlah seruan Allah dan seruan Rasulnya apabila Ia menyeru kamu kepada perkara-perkara yang menjadikan kamu hidup sempurna; dan ketahuilah bahawa sesungguhnya Allah berkuasa mengubah atau menyekat di antara seseorang itu dengan (pekerjaan) hatinya, dan sesungguhnya kepada-Nyalah kamu akan dihimpunkan.

Ayat ini secara jelas memerintahkan semua orang yang beriman agar menyahut seruan Allah s.w.t. dan Rasulullah s.a.w. yang memberikan satu konsep kehidupan yang bersyariat. Kemuncak hidup yang paling tinggi adalah dengan beriman kepada Allah s.w.t. dan setiap sesuatu perkara yang dilakukan semestinya atas tujuan yang dibenarkan oleh Allah.s.w.t.. Ia menjadi faktor utama dalam kehidupan manusia.

FAKTOR PENDIDIKAN DAN RAKAN SEBAYA

Pendidikan menjadi suatu asas bagi melahirkan seseorang remaja yang berilmu dan berthaqafah. Melalui pendidikan juga dapat melatih para remaja mempunyai tahap pemikiran yang matang dan jati diri yang kuat dalam membantu mereka melakukan segala tindakan dan keputusan. Para remaja dapat berfikir secara rasional tentang baik buruk sesuatu perkara melalui pendidikan yang baik samada formal di sekolah atau tidak formal di rumah. Hasil kajian mendapati rata-rata remaja yang terlibat dengan seks bebas sehingga lahirnya anak tak sah taraf adalah dari golongan mereka yang mempunyai taraf pendidikan yang rendah. Mereka tidak berpeluang untuk menyambung pelajaran ke peringkat yang lebih tinggi disebabkan kurang berminat atau galakan daripada ibu ayah sendiri. Terdapat juga remaja yang terpaksa berhenti sekolah disebabkan oleh masalah kewangan yang dihadapi oleh keluarga dan terpaksa bekerja di usia muda. Rata-rata mereka bekerja dalam bidang *retail* seperti menjadi jurujual di pusat membeli belah dan terdedah dengan pergaulan bebas dengan orang ramai. Tidak kurang juga yang hanya menganggur dan melepak di rumah dan bergaul dengan rakan-rakan yang tidak baik. Selain itu, kajian mendapati rata-rata remaja yang terlibat kurang pengetahuan berkenaan pendidikan seksual sehingga tidak mengetahui bahawa perbuatan seks yang mereka lakukan tidak akan menyebabkan mereka mengandung dan sebagainya.




Rajah 3: Taburan Kod-Kod Hasil dari Temu bual terhadap Responden bagi Faktor Pendidikan

Kajian mendapati bahawa kebanyakan remaja yang terlibat dengan masalah seks bebas sehingga melahirkan anak tak sah taraf adalah berpunca daripada pengaruh rakan sebaya. Faktor luaran ini adalah akibat daripada perkembangan dan proses perubahan manusia kepada suatu tahap yang baru yang

memerlukan rakan dalam bersosial. Situasi sosial ini tidak diperoleh di rumah melalui keluarga, kerana kebiasaannya pendedahan masa dengan rakan-rakan adalah lebih banyak dalam aktiviti harian. Perkongsian berkenaan perasaan, hal ehwal peribadi dengan rakan-rakan adalah suatu perkara yang cenderung dilakukan oleh remaja pada tahap ini. Hal ini menurut Hasbullah (2016) adalah disebabkan sifat keluarga terkini yang lebih ke arah berbentuk nukleus, keluarga yang berpecah, kurangnya komunikasi antara ibu bapa dan anak, dan kurangnya pemantauan terhadap media sosial oleh ahli keluarga.

Kajian menunjukkan rata-rata mereka yang terlibat dengan gejala ini adalah mereka yang mempunyai rakan yang pernah terlibat dengan seks bebas dan gejala rosak akhlak. Tambah lagi, percintaan dalam kalangan remaja yang dianggap wajib pada masa kini telah menyebabkan mereka dipengaruhi dengan pasangan kekasih masing-masing. Mereka sanggup melakukan apa sahaja yang diminta oleh kekasih dan rakan sebaya kerana khuatir tidak akan diterima untuk berkawan dengan mereka.



Rajah 4: Taburan Kod-Kod Hasil dari Temu bual terhadap Responden bagi Faktor Rakan Sebaya

50% daripada responden menyatakan bahawa pengaruh rakan sebaya sebagai faktor penyumbang, 25% pula mempunyai rakan yang terlibat dengan seks /rosak akhlak sebagai faktor penyumbang, manakala 13% dan 12% lagi menyatakan percintaan dalam kalangan remaja dianggap wajib dan juga supaya diterima oleh rakan sebaya. Hal ini jelas seperti mana yang disabdakan oleh Rasulullah s.a.w.;

المرء على دين خليله فلينظر أحدكم من يخال


Maksudnya: Seseorang akan mengikuti dengan agama (pegangan) teman rapatnya. Hendaklah kalian memerhatikan siapa yang dia jadikan teman rapatnya.”

(Hadis Riwayat Abu Daud dan Tirmidzi)

Rakan memberikan pengaruh yang sangat besar terhadap temannya. Mereka mampu memberikan kesan dan pengaruh terhadap pegangan agama, pandangan kehidupan, jatidiri dan sikap seseorang. Maka dalam memilih rakan, seharusnya pelbagai faktor diambil berat dan panduan ini sepatutnya dijadikan rujukan dalam memilih rakan. Rakan yang baik, akan memandu ke jalan yang lurus, rakan yang sebaliknya akan menjerumuskan diri ke lembah kebinasaan.

FAKTOR TEKNOLOGI, ORIENTASI SEKSUAL REMAJA DAN PERGAULAN BEBAS


Kemajuan teknologi mendatangkan 1001 kebaikan kepada manusia. Era perkembangan komunikasi tanpa batasan memberi impak yang lebih besar kepada sistem sosial dalam masyarakat. Hal ini berikutan banyak pautan-pautan yang lucu dan aplikasi-aplikasi telefon muncul yang memudahkan komunikasi tanpa batasan. Nurul (2011) telah berjaya mengenal pasti pengaruh internet terhadap keruntuhan moral dan akhlak remaja Islam. Impak tidak baik seperti mencuri, merompak, rogol, berzina, terlibat kegiatan samseng, dan ponteng sekolah sebenarnya punya perkaitan dengan impak teknologi tanpa batasan ini (Gan Kong Meng, 2007). Menurut sumber daripada Kementerian Pembangunan Wanita, Keluarga, dan Masyarakat (KPKM) (2014) menjelaskan bahawa lebih satu pertiga (35.3%) remaja pernah terdedah dengan 60% daripada bahan lucu adalah diperolehi daripada internet. Remaja yang paling banyak terdedah dengan bahan ini adalah mereka yang berumur antara 18-24 tahun mencatat 42.8% peratusan yang lebih tinggi berbanding remaja berumur antara 13-17 tahun, iaitu dengan hanya mewakili 29.9% peratus (Hasbullah Fauwaz, 2016). Kesan daripada pendedahan yang melampau ini menjadi dorongan utama para remaja untuk melakukan zina dan terlibat dalam kes rogol (Dain Rosmah, 2015).



Rajah 5: Taburan Kod-Kod Hasil dari Temubual terhadap Responden bagi Faktor Teknologi

Bagi faktor ini, sebanyak 45% dari responden melihat pengaruh teknologi merupakan faktor tersebar yang mempengaruhi kelahiran anak tak sah taraf dalam kalangan masyarakat Muslim di Malaysia. 22% pula mengisyaratkan bahawa bahan lucah dan pornografi menjadi kesan langsung terhadap permasalahan ini. Bahkan teknologi pencegah kehamilan juga merupakan sebahagian daripada sub faktor dengan 11% responden.

Orientasi seksual remaja merupakan salah satu faktor utama penyebab kepada ketagihan seks dalam kalangan remaja. Faktor ini menyumbang kepada kelahiran anak tak sah taraf dalam kalangan masyarakat muslim di Malaysia.




Rajah 6: Taburan Kod-Kod Hasil dari Temubual terhadap Responden bagi Faktor Orientasi Seksual

55% responden yang ditemubual menyatakan bahawa ianya merupakan pengaruh dari perasaan semula jadi. 18% menyatakan keinginan syahwat, dan mempunyai sejarah mengandung serta pernah dicabul. 9% menyifatkan ianya sebagai lambing pengorbanan dan cinta. Hal ini menyebabkan kebanyakan remaja khususnya remaja perempuan pada mulanya melakukan seks atas dasar cinta dan sayang kepada pasangan mereka. Setelah terjebak dengan aktiviti ini mereka bukan lagi melakukan seks ini kerana dasar tersebut, tetapi lebih kepada masalah ketagihan. Menurut Subhi, Nasrudin, Abu Bakar, Radhiah, Ahmad, Norazura, et al. (2012) remaja yang terlibat dengan aktiviti ini sanggup bertukar-tukar pasangan bagi memenuhi ketagihan seks yang dialami mereka dan melakukannya seperti pasangan yang sudah berkahwin dari segi kekerapan melakukannya.

Hasil kajian mendapati remaja yang terlibat dengan gejala seks bebas sehingga lahirnya anak luar nikah ini adalah mereka yang mempunyai pergaulan bebas tanpa kawalan. Kebanyakan mereka tidak dikawal oleh ibu bapa dan keluarga sehingga boleh melepak di tempat hiburan seperti di kompleks membeli belah dan taman rekreasi sehingga lewat malam. Tidak kurang juga, sebahagian mereka yang mengambil minuman yang memabukkan dan barang yang terlarang seperti dadah dan pil khayal yang membuka ruang yang amat besar kepada gejala seks bebas ini. Kajian yang dilakukan oleh Idris Awang menunjukkan bahawa pergaulan bebas antara remaja sudah melampaui batas sehingga mereka bebas untuk pelbagai aktiviti yang menjerumus kepada hubungan seks seperti berpegang tangan (81.733%), bercium (63.47%), meraba tempat sulit pasangan (48.70%), melakukan hubungan seks (54.78%), pergi ke rumah pasangan ketika tiada orang lain (34.78%) dan bermalam dan tidur bersama (46.09%) (Aliah Ismail, 1996). Kajian tersebut, walaupun dilakukan pada tahun 1996, dapat menjadi rujukan bahawa pada sejak zaman tersebut lagi telah ada pecahan berkaitan faktor pergaulan bebas yang menjadi punca

permasalahan sosial yang tidak berkesudahan. Kajian ini merekodkan sebanyak tiga sub faktor dalam tema pergaulan bebas, iaitu masing-masing 40% mengakui bahawa pengaruh pergaulan bebas dan lepak adalah punca utama permasalahan kepada penyumbang kadar kelahiran anak tak sah taraf. 20% lagi menyifatkan sebagai pesta muzik dan bahan terlarang seperti dadah adalah sebahagian sub faktor yang terlibat.



Rajah 7: Taburan Kod-Kod Hasil dari Temu bual terhadap Responden bagi Faktor Pergaulan Bebas

Dalam mendepani cabaran ini, peranan solat, puasa dan pengawalan hawa nafsu perlu dilihat melalui konteks penyempurnaan ibadah dan pencegahan:

اتْلُ مَا أُوحِيَ إِلَيْكَ مِنَ الْكِتَابِ وَأَقِمِ الصَّلَاةَ ۖ إِنَّ الصَّلَاةَ تَنْهَىٰ عَنِ الْفَحْشَاءِ وَالْمُنْكَرِ ۗ وَلَذِكْرُ اللَّهِ أَكْبَرُ ۗ وَاللَّهُ يَعْلَمُ مَا تَصْنَعُونَ

Maksudnya: Bacalah serta ikutlah (wahai Muhammad) akan apa yang diwahyukan kepadamu dari Al-Quran, dan dirikanlah sembahyang (dengan tekun); sesungguhnya sembahyang itu mencegah dari perbuatan yang keji dan mungkar; dan sesungguhnya mengingati Allah adalah lebih besar (faedahnya dan kesannya); dan (ingatlah) Allah mengetahui akan apa yang kamu kerjakan.

(Surah Al-Ankabut Ayat 45)

Ayat tersebut menyarankan agar ibadah seperti solat diberikan penekanan kerana kekuatannya untuk mencegah dari perbuatan yang keji dan munkar. Begitu juga dengan hadis berikut:

يَا مَعْشَرَ الشَّبَابِ، مَنْ اسْتَطَاعَ مِنْكُمُ الْبَاءَةَ فَلْيَتَزَوَّجْ، فَإِنَّهُ أَغْضُ لِلْبَصْرِ، وَأَحْصَنُ لِلْفَرْجِ، وَمَنْ لَمْ يَسْتَطِعْ فَعَلَيْهِ
بِالصَّوْمِ، فَإِنَّهُ لَهُ وَجَاءٌ

Maksudnya: "Wahai sekalian pemuda, siapa diantara kalian telah mempunyai kemampuan, maka hendaklah ia menikah, karena menikah itu dapat menundukkan pandangan, dan juga lebih bisa menjaga kemaluan. Namun, siapa yang belum mampu, hendaklah ia berpuasa, sebab hal itu dapat meredakan nafsunya."

(Riwayat al-Bukhari 4678, Kitab al-Nikah, Bab man lam Yastati' al-Ba'ah Falyasumh).

Begitu juga dengan hadis yang disebutkan, memberi penekanan terhadap usaha menjaga diri dari perkara keji dan munkar dengan berpuasa. Hal ini dapat diambil iktibar daripada kesan menuruti hawa nafsu yang dirakamkan di dalam al-quran:

فَخَلَفَ مِنْ بَعْدِهِمْ خَلْفٌ أَضَاعُوا الصَّلَاةَ وَاتَّبَعُوا الشَّهَوَاتِ ۖ فَسَوْفَ يَلْقَوْنَ عَذَابًا (59) إِلَّا مَنْ تَابَ وَآمَنَ وَعَمِلَ صَالِحًا
فَأُولَٰئِكَ يَدْخُلُونَ الْجَنَّةَ وَلَا يُظْلَمُونَ شَيْئًا (60)

Maksudnya: Kemudian mereka digantikan oleh keturunan-keturunan yang mencuaikan sembahyang serta menurut hawa nafsu (dengan melakukan maksiat); maka mereka akan menghadapi azab (dalam neraka), Kecuali orang-orang yang bertaubat dan beriman serta beramal soleh, maka mereka itu akan masuk Syurga, dan mereka pula tidak dikurangkan pahala sedikit pun.

(Surah Maryam 59-60)

Berikutnya, menjaga pandangan dan mengelakkan dari khalwat juga sebahagian dari saranan yang perlu dipertimbangkan dalam mendepani faktor ini. Dalam satu hadis Rasulullah s.a.w. bersabda:

كُتِبَ عَلَى ابْنِ آدَمَ نَصِيْبُهُ مِنَ الزَّانَا مُدْرِكُ ذَلِكَ لَا مَحَالَةَ فَالْعَيْنَانِ زَانَاهُمَا النَّظْرُ وَالْأُذُنَانِ زَانَاهُمَا الْإِسْتِمَاعُ وَاللِّسَانُ
زَانَاهُ الْكَلَامُ وَالْيَدُ زَانَاهَا الْبَطْشُ وَالرَّجْلُ زَانَاهَا الْخُطَا وَالْقَلْبُ يَهْوَى وَيَتَمَنَّى وَيُصَدِّقُ ذَلِكَ الْفَرْجُ وَيُكَذِّبُهُ

Maksudnya: "Ditetapkan atas anak cucu Adam bahagiannya dari zina akan diperoleh hal itu tidak mustahil. Kedua mata zinanya adalah memandang (yang haram). Kedua telinga zinanya adalah mendengarkan (yang haram). Lisan zinanya adalah berbicara (yang haram). Tangan zinanya adalah memegang (yang haram). Kaki zinanya adalah melangkah (kepada yang diharamkan). Sementara hati berkeinginan dan berangan-angan, sedang kemaluan yang membenarkan semua itu atau mendustakannya."

(Riwayat Muslim 4802, *Kitab al-Qarar, Bab Qadar 'ala Ibn 'Adam Hazzah min al-Zina wa Ghayrih*)

Ia dapat mengelakkan perzinaan dan seterusnya mengekang kelahiran anak tak sah taraf dalam kalangan masyarakat Muslim di Malaysia.

KESIMPULAN

Hasil daripada temu bual dan proses pengekodan data-data yang dikumpulkan menunjukkan terdapat beberapa tema yang utama berkaitan dengan gejala lahirnya anak tak sah taraf termasuklah faktor-faktor yang mempengaruhi keterlibatan seseorang dengan hubungan seks itu sendiri. Secara keseluruhannya, terdapat tujuh tema utama faktor-faktor yang mempengaruhi seseorang terlibat dengan hubungan seks sehingga melahirkan anak tak sah taraf antaranya ialah, faktor keluarga, agama, pendidikan, rakan sebaya, teknologi, orientasi seksual/ perasaan semula jadi, dan pergaulan bebas. Faktor-faktor ini bukan sahaja menjadi punca kepada masalah seks bebas sehingga melahirkan anak tak sah taraf dalam kalangan masyarakat Islam di Malaysia, bahkan ia turut menjadi punca utama kepada masalah sosial yang lain. Semua pihak perlu mengorak langkah memainkan peranan masing-masing dalam membendung faktor-faktor ini daripada akar umbi agar masalah sosial ini dapat dikurangkan. Saranan dari kerangka al-quran dan al-sunnah perlu dilihat dengan lebih teliti agar sekurang-kurangnya ia dapat membantu mengurangkan kes-kes yang mendorong kepada peningkatan kelahiran anak tak sah taraf. Adalah dicadangkan agar saranan seperti ini dijadikan dalam bentuk modul bagi mengekang peningkatan bilangan anak tak sah taraf dalam kalangan masyarakat Islam di Malaysia.

PENGHARGAAN

Penghargaan diberikan kepada Jabatan Kemajuan Islam Malaysia di bawah Geran Khas Kajian Anak Tak Sah Taraf Dalam Kalangan Masyarakat Islam di Malaysia, kod geran: USIM/JAKIM/FSU/41619.

RUJUKAN

Aliah Ismail, (1996). *Hubungan seks bebas di kalangan remaja Melayu: punca dan penyelesaiannya dari perspektif Islam, kajian kes di Lembah Klang* (Doctoral dissertation, Fakulti Syariah, Akademi Islam, Universiti Malaya, 1995/96.).

Dain, Rosmah. (2015, 19 Mei 2015). Barah Pornografi Rosak Masyarakat. *Utusan Malaysia Online*. Retrieved from <http://www.utusan.com.my/gaya-hidup/keluarga/barah-pornografi-rosak-masyarakat-1.93575>

Gan, Kong Meng. (2007). Kajian Kes Perogol di Penjara Negeri Kedah dan Perak. Tidak diterbitkan. Tesis Sarjana, Universiti Sains Malaysia.

Hasbullah, Fauwaz. (2016). Seksualiti Remaja: Isu Dan Cabaran Keluarga Di Malaysia. Kertas Kerja Dalam Seminar Isu-Isu Seksualiti Peringkat Kebangsaan 2016. Dewan Perdana,

KKPM, Kementerian Pembangunan Wanita Keluarga Dan Masyarakat. 2014. Kajian Penduduk Dan Keluarga Malaysia Kelima. Putrajaya: Kementerian Pembangunan Wanita, Keluarga, Dan Masyarakat.

Sarnon, N., Mohamad, M. S., Fauziah, I., Alavi, K., Nen, S., Hoesni, S. M., ... & Azreena, W. J. (2012). Hamil luar nikah: Memahami remaja sebagai asas intervensi keluarga. *e-BANGI*, 7(1), 121-130.

Subhi, N., Bakar, R. A., Ahmad, N., Hoesni, S. M., Ibrahim, F., & Mohamad, M. S. (2012). Hubungan Seksual Remaja: Antara Cinta dan Nafsu. *e-BANGI*, 7(1), 15-25.

Zulkiffly Ahmad. (2006). Jenayah Seksual. Mostagain Resources Publications.

Dahlan, N. H. M. (2017). Mengandung anak tak sah taraf: Kajian kes di Daerah Kubang Pasu, Kedah. *UUM Journal of Legal Studies*, 8, 17-55.